


Noblia: «Funtsean mentalitateen aldaketa eskatzen du Herrikoak»

Hamar milioi liberako kapitalari egiten dio apostua Elkarte honek


Herrikoak bere hamargarren urtemuga ospatzen du. Ipar Euskal Herrian enpleguaren azkartzeko sortu den empresa horrek kanpaina berri bat du abiatua bere kapitalaren emendatzeko. Hain zuzen, kanpaina honen helburua hiru mila lanposturen sorketa litzateke. Horrelako desafioak botatzen dituen elkarteak hobeki ezagutu nahi izan dugu eta Patxi Nobliarekin solastatzera joan gara.

XAN GOENA / BAIONA



Patxi Noblia Sokoa enpresako zuzendaria da.

ALLENDE



Noblia, Herrikoaren sortzaileetarikoa.

ALLENDE

✓ «Credit Agricolekin harreman onak izateak laguntzen gaitu, baina garrantzitsuena litzateke haien bezeroekin eta semealabekin harremanetan sartzea geroa aldatzeko».

EGUNKARIA.—Herrikoa sortzen zen duela hamar urte, azterketa bat eginik. Ipar Euskal Herri azpigaratu honetan, sosa bazela aurrezki gisa bildua. Euskaldunek berek sos horren parte bat bilduz, erabil zezaketen hemen berean enpleguak sortzeko. Azterketa horrek beti balio ote du?

NOBLIA.—Herrikoaren indarrekin ez dugu asko aldatu itsasoaren mugimendua. Aurrezkien % 1 besterik ez du biltzen Herrikoak, % 1 horrekin zerbait aldarazi dugu bai, bainan % 99a hein berean gelditzen da eta hemengo sosa beti Parisera joanki da handien aberastera, hala nola: Carrefour, Galeries Lafayette...

Diruaren biltzeaz gain, Herrikoaren helburua zen eta da, lanari buruzko iritzien aldatzea: ez egon beha, egin, gure gain hartu. Parte hartze hortan, diru kopuru bat irriskatzea bat da bainan behar da ere eta bereziki indarra egin lana sortzen laguntzeko: merkatua ikertu, nor berak bere burua formatu, seme alabak presta Irisarrin edo Heletan lan egin dezaten, Pariseko postan aritzeko orde...

Leihu batzu ideki ditugu bainan gure helburuetarik urrun gara, helmuga finkatu genuen 1985eko 1500 enplegu, gaur, 1990ean 1200etan gaude.

EGUNKARIA.—Bai, iduri du helburuen ardiesteko, pentsatu zenaren denboraren dolea ematen dela. Zergatik hori, sos biltzea ez da aski?

NOBLIA.—Gure desmartzak, mentalitateen aldaketa eskatzen du eta bai ekonomian, bai kulturen, bai mintzairan, bai politikan, aldaketak nahiko hemeki egiten dira. Kontserbatismoa izan daiteke arrazoina bainan bestalde, taller edo lantegi baten kudeatzeko jendea ez duzu egunetik biharramunera prestatzen ahal.

Herrikoan barnean ere jendea ez da hainbeste formatzen, nahi genduke akziodunak militante ere izatea, mileruski ez da beti hala gertatzen, akziodunek sosa eman dute bai bainan ez dira arduratu kantonamenduetan edo eskualdeetan lan posibilitateen aztertzeko eta tokiko talde dinamikoaren kudeatzeko.

EGUNKARIA.—Halere, hamar urteren buruan, Herrikoak sinesgarritasuna bildu du instituzioetatik. Gaur egun, Credit Agricole eta Komerzio Ganbara besteak beste, partaide dira. Luzaran horrek alda lezake Herrikoaren izaera?

NOBLIA.—Ekonomia zailagoa da etsaien artean borrokan aritu behar baduzu. Hastapenean ardi beltza bezala kontsideratuak ginen, mesfidantza zen nagusi. Baztertze prozesu hori moztua izan da hein handi batetan, Credit Agricole eta Komerzio Ganbara gureganik hurbildu direnetik. Alde hortarik positiboa da bainan gure funtsezko helburua ez da kanpoko itxura ematea bainan bai barneko erroak azkartzea. Credit Agricolekin harreman onen izateak laguntzen gaitu bainan garrantzitsuena litzateke Credit Agricoleko beze-

roekin eta haien semealabekin harremanetan sartzea geroa aldaratzeko. EGUNKARIA.—Finantza mundua eta Instituzioekilako harremanek itxuratik at ez ote dute deus aintzinarazi? Garapen ekonomikorako agentzia ez dea bideratua?

NOBLIA.—Kasuka, baten edo bestearen laguntza puntuala ukaiten ahal dugu bainan orokorki ez da harremanik sortu zerbait funtsezkoaren bideratzeko. Oraino bakotzak berea saldu nahi du eta denen artean zerbaiten planifikatzeko orde, bakotzak bere bandera altxatzen du: Grenet, Baionako auzapezak: Sony lantegia, Komerzio Ganbarak: Baionako portua. Egoera horren nolazpait aldatzeko sortu zen Garapen Ekonomikorako Agentziaren ideia, Joxe barne ministroaren bisitaren ondotik.

Ipar Euskal Herriak nola kulturen,

Herrikoaren Nortasun Ageria

X.G. / BAIONA

Herrikoa sozietate anonimoa da, 1980eko azaroaren 20an sortu zen helburu zehatz batekin: Iparraldeko etorkizun ekonomikoa hobetzea, enplegu berrien sorkuntza lagunduz.

Angeluko Alliance deitu egoitzan kokatua da, 7 500 000 liberako kapitala biltzen du eta 2200 akziodun. Herrikoak bere kapitalaren parte bat sartu duen lantegiak ondoko hauek dira nagusiki: S.E.I. Informatika eta elektronikako enpresa baionarra, 180 langile biltzen dituena.

Alki, mublegintzan aritzen den Itsasuko kooperatifa, 36 langilerekin. Sokoa, bulegoko mublegintzako enpresa hendaia.

hala ekonomian, egitura berezi bat behar du. Jokoan sartu gara eta muntatuak izan diren komizioetan oharak azterketak eta proposamenak aintzintatu ditugu. Orain da zinez proposamen horien bideratzeko, ordua. Egitasmoak hor dira, medioen ezartzea, podere publikoen eskuetan da, laster jakin beharko dugu horien ihardespena.

Gauzak hemeki hemeki doaz eta poderedunak ez dira, gure iduriko, behar bezala inplikatzeko. Alta garapen ekonomikoa lortzeko, Herrikoak ez du aski indarrik, funtsezko motorra pizteko, lau elementu katenatu behar dira: herriko jendea, Komerzio Ganbara, Pariseko eta hautesiak. Badakigu azkenak hautetsiak izanen direla, bainan oraindik beste hiru elementuak bederen martxan eman behar dira.

L'ABURREAN

ENPLEGU erregulpenak Tuterako SKF enpresan

Datorren urteko urtarrilaren hogehira bitartean, Tuterako (Nafarroa) SKF lantegiak atek itxita izango ditu, enplegu erregulapenei ekin dielako. Errodamenduak egiten dituen enpresa honetan 424 langilek egiten du lan. Automobil sektorearen krisiak eragin duen produkzioaren stok-ari aurre egiteko, hartu dute lantegiko buruek, 72 egunotan lanak bertan behera uzteko erabakia.

ARISTRAIN eta British Steele akordio batera iristear

Aristrain enpresa siderurgikoak ezagutzera eman duenez, urte honen amaierako hel daiteke akordio batetara Britis Steel-ekin. Akordio honen arabera, Aristrainek bere kapitalaren ehuneko berrogeitabosta salduko lioke multinazional amerikarrari. Dena den, oraindik ez dute zehaztu zenbatekoa izango den salerosketaren kostua, baina litekeena da 25.000 milioi pezeta (1.385 milioi libera) ingurukoa izatea.

GASOLINAREN prezio berriak astelehenean finkatuko Campsak

Eranegun finkatu zituen Espainiako gobernuak datozen asteotarako gasolinaren gehienezko prezioak, eta orain Campsari dagokio prezio errealeak zeintzu izango diren erabakitzea. Gobernuak pezeta batean merketu du gasolina superra eta berunik gabekoa (87,5 eta 85,3tan ezarrit). Gasolina normalaren gehienezko prezioak ere behera egin du, 1,1 pezetatan, 84 pezetatan finkatuz. Erregaien gehienezko prezioak hamabostean behin finkatzen dira.

SPRITEL programari buruzko hitzaldiak izango dira Donostian

Gipuzkoako Merkatal ganbararen laguntzaz, eta SPRIren zuzendaritzarekin, igandean emango zaie hasiera Donostian, «Spritel programa» izenburuko ihardunaldiei. Hitzaldi hauen asmoa, gipuzkoarrek telematikaren erabilerari buruz duten ezagutza zabaltzea izango da. Horrez gain, SPRI Elkarteak kideek adierazi dutenez, Britainia Handiko enpresarekin hartuemanetan dabilta egunotan.